

# Lavar e sientar efficientamain en ina chasa da pliras famiglias

■ (cc) Lavar e sientar laschiva dovra var 20 pertschient dal consum d'electricidad total d'ina chasa da pliras famiglias. Tge facturs architectonics e manaschials caracteriseschan ina lavandaria buna ed efficienta? Questa ed ulteriuras dumondas discutan in'experta e dus experts a l'apero d'energia che ha lieu mesemna, ils 14 da november 2012 da las 17.00 fin a las 19.00 en l'aula da la scola auta da tecnica ed economia (Sate) a Cuira. Ord vista da l'ecologia è la lavandaria cuminaivla ina furma adequata per organisar il lavar ed il sientar en ina chasa da pliras famiglias. Ina lavandaria cuminaivla optimala na spargna – grazia a maschinas efficientas – betg mo blera electricidad e custs da gestiun per las abitanas ed ils abitants, mabain procura cun ina gestiun uschè flexibla sco pussaivel e cun ina infrastruttura da localitads ch'è accordada cun ils basegns da las utilisadras e dals utilisaders er per dapli qualitad d'abitar. Il cuntrari èn turs da lavar en las abitaziuns che n'han bain betg ils medems avantatgs per l'ecologia e per la cuminanza, percenter crodan per gronda part davent ils eventuels conflicts ch'i dat en connex cun lavandarias.

## Manual cun recumandaziuns praticas

En il rom da ses referat a l'apero d'energia a la Sate a Cuira vegn *Barbara Josephy* a mussar quels facturs ch'èn caracteristics per ina lavandaria buna ed efficienta. La manadra da project tar la pagina d'internet per spargnar electricidad topten.ch ha elavurà – per incumbensa da la citad da Turitg e da l'ovra electrica da la citad da Turitg (ewz) – tras retschertgas voluminusas la basa per il mussavia actual «Lavar e sientar efficientamain en ina chasa da pliras famiglias». En il center stat en quest connex la lavandaria cuminaivla. Il mussavia che vegn exponì a



La lavandaria cuminaivla è ecologicamain anc adina d'avantatg.

FOTO A. SANCHEZ

l'apero d'energia cuntegna recumandaziuns praticas e glistas da controlla per patrunas e patruns da construcziun, per administraziuns d'immobiglias e per planisadras e planisaders.

## Da saluns da lavar e da l'isolaziun cunter la perdita da chalur

Co ch'ina societad d'abitar organisescha il lavar ed il sientar en la pratica mussa *André Mäder*, administratur d'immobiglias tar la societad d'abitar Asig, a l'apero d'energia. La Asig realisescha lavandarias cuminaivlas da princip sco usche-

numnads «saluns da lavar». En edifizis novs èn questas localitads ch'èn concepidas en moda attractiva equipadas cun maschinas da lavar e cun sientaders cun ina pompa a chalur da la meglra classa d'effizienz energetica. En chasas da pliras famiglias existentas da la Asig vegnan las maschinas remplazzadas pass per pass tras maschinas ecologicas. Las locatarias ed ils locataris han però er la libertad da laschar installar sin agens custs ina macchina da lavar en l'abitaziun. Da questa libertad ha profità circa la mesadad da las locatarias e dals locataris.

Tar ils aspects impurtants d'ina lavandaria moderna e favuraivla per las utilisadras e per ils utilisaders tutgan er ina isolaziun optimala cunter la perdita da chalur sco er ina buna ventilaziun. En spezial è quai impurtant tar edifizis novs e tar edifizis renovads sche la lavandaria e la chombra da sientar sa chattan en il plaun sutterran. Quest tema architectonic vegn a declerar pli detagliadamain *Alex Herzog* da l'Uffizi da rument, d'aua, d'energia e d'aria da la citad da Turitg.